

虛受堂文集

虛受堂文集卷九

長沙 王先謙 益吾

誥封榮祿大夫三品頂戴四品京堂郭公神道碑

公諱崑燾元名先梓字仲毅意城其自號也晚更號檇
叟湘陰郭氏曾祖熊貢生祖世遵廩膳生本生祖詮世
優增生考家彪議敘八品三世皆贈光祿大夫妣皆一
品太夫人公兄弟三人長前兵部左侍郎嵩燾次公次
貴州候補道崙燾皆負時名公及侍郎尤早達以文章
器識並重海內侍郎以名進士入翰林供奉內廷而
公方盛年會試再黜輒絕意科舉侍郎洊歷封疆爲

天子大臣持節數萬里外而公優游莫府婁辭薦剡足
不出里門心不以顯仕爲樂侍郎慷慨喜論事剖析當
否必窮物情而公終日恂恂不見涯際至於天性篤厚
接人以誠操筆落紙累數千言弗窮肆應推揚賢善如
不及規畫當世之務發微洞遠若著蔡之於卜筮罔不
同也公年十二有神童之目與侍郎同補弟子員覆試
投卷學使見公幼謂曰得非汝兄所爲邪公請試他題
就案起草立成學使歎奇之年二十以優增生中式道
光甲辰 恩科舉人入都與侍郎同主曾文正公國藩
學益進咸豐二年壬子粵寇圍長沙巡撫張公亮基梯

城入守延今大學士恪靖侯左公宗棠暨公入莫府逮
總督湖廣復延公及左公往張公左遷則皆辭歸又皆
爲巡撫駱文忠公秉章禮聘贊戎政權商稅兵食大充
左公奉 命督師公實始終總理駱公入川毛公鴻賓
惲公世臨繼之倚公以辦是時湖南兵出四援南兩粵
西蜀滇黔東豫章浙閩而曾公東征召募飛輓無虛日
一根本湖南時其緩急應機立濟輯和將率屏扞疆圉
沛然釐然退若無事雖大吏婁易任專於公數千里外
血脈貫輸事會靡滯故公晏處閭里其勛澤常在天下
粵寇平公辭莫府劉公崐撫湖南以援黔剿苗復延公

贊畫黔苗平遂辭不出維聖清用法制齊壹宇內鄉里搢紳以安靜守己自繩無敢與公事取謗戾及東南大亂湖湘豪俊挺奮忠義節鉞背望矛戟芻粟於是焉取資非邦之大賢不足信疆吏筦事樞聯洽眾志故公與左公乘時戡亂樹聲桑梓開二百年未有之局亦遭其勢而然也然當時左公中飛語爲總督齟齬幾蹈不測禍而公和平遜順不有成勞雍容進退以義自飭故當其任無危機竟其事無遺議可謂善自處矣光緒元年乙亥公子慶藩官浙江迎公就養大江南北暨浙東西名山勝蹟遊覽都徧益雄於詩踰數年歸以光緒八

年壬午十月二十九日卒享年六十始公迭卻大吏奏薦強而後受由國子監助教晉內閣中書四品京堂加三品頂戴 特旨賞花翎著有雲卧山莊詩集二十卷文集二卷尺牘八卷夫人同邑盛氏子三慶藩優廩貢生二品頂戴浙江補用道慶蓉候選同知出後從父慶讓縣學生五品頂戴兩淮候補鹽經歷女六三適士族其二殤一待字孫男七孫女四某年月日葬某原慶藩泣請文其墓道之碑迺爲銘曰

皇。宇。熾。豐。巨。奸。煽。粵。孰。扼。其。吭。以。翦。狂。孽。地。靈。孕。鍾。騰。衡。蹕。湘。眾。力。合。冶。遂。銷。寇。鋌。峩。羣。帥。奮。張。威。略。居。中。

權衡時維左郭二妙入幕如壘叶簾左總師干繫公獨
治千里赴機一以坐照軍書紛拏大府吟嘯區寓再奠
澹遺世榮眾取不取高名無名羣賢交推九重褒美
不朽有三何必貴仕孰固吾圉歷久或忘我銘公勲以
詔吾鄉

提督銜陝西延綏鎮總兵官楊剛介公神道碑

公姓楊氏諱昌泗字廉泉湖南乾州廳人曾祖正舉祖通能父光重皆不仕以公贈如其官光重讀書有至性鄉里稱善人乾隆五十九年大學士福康安奉命督辦苗疆軍務光重在幕中時獲苗人數十將戮之大學士問光重識否光重不忍對曰皆識之苗得不死夫人姚氏有子二人長昌凱甘肅貴德營遊擊署礮伯營副將從征廣東有功賞花翎次卽公也年十三苗賊劫公里公祖母黃太夫人挈公走遇賊賊戕太夫人公悲憤躍起奪賊刀追刃之長老驚爲神勇以武學生入乾

州協右營游補千總道光十二年永州猖叛奉檄往捕
毀洋泉賊巢擒趙金隴弟滿子擢鎮筵鎮標前營守備
平廣東連州八排猺 賞花翎 賜驍勇巴圖魯號擢
沅州都司調寶慶協中軍都司十六年擒武岡州賊羅
在清等擢永州鎮中營遊擊二十年擢貴州朗洞營參
將雲貴總督用廉明公正足膺重寄奏薦遷直隸大沽
協副將甘肅西甯鎮廣東高州鎮總兵官咸豐元年平
欽州土賊下部優敘以營勇滋事失察奪職三年粵寇
大煽 特詔赴山東辦理防剿至湖北總督等奏留領
兵平黃州游匪破田家鎮賊四年以違總督節制復被

劾發軍臺公壁武昌連擊走漢鎮賊船毀礮窩壘免發
遣武昌陷公從巡撫青磨入湖南荊州將軍官文奏率
所部擊賊監利螺山大破之火漢陽賊船剗蝦蟆礮鸚
鵡洲壘毀大別山下木柵數十生擒僞將總制等薄漢
陽城先登克之明日克漢鎮復原官駐蘄州疏防竄賊
摘頂戴復廣濟黃梅 賞還授陝西延西鎮總兵官五
年武漢復陷公扼賊沔陽破之浙河仙桃鎮從官文再
復漢陽功最加提督銜七年之任河南撚賊熾八年
詔公督軍馳勦公聞 命卽行抵開封疾亟十一月二
十四日卒於軍年七十有六遺疏 聞照提督例 賜

卹 賞銀二百兩治喪廕一子六品頂戴送部引 見

錄用 予諡剛介公自少迄老積勞兵閒將無懦卒當
靡強寇應機立辦退若無事所至有聲績尤久於湖北
同時領將多拔自義勇由驟升公以行伍老成頡頏其
閒臨事不後論功不先議論局量越儕輩咸歛手傾服
無忌嫉者意氣奮發忘其老至不以榮辱易心夷險異
節故雖累獲嚴譴而 眷倚不衰咸豐九年三月葬廳
城南獅子山妻田氏夫人廳學生宏受女後公卒於同
治六年六月初十日年八十有五別葬城南某山子男
三人勝棠武學生衡州協把總勝業乾州協把總並從

征廣東 賞藍翎勝棠從公戰湖北沒於軍勝業戰廣
西以傷沒勝傑五品軍功把總女三人適某某孫男
二人秀觀二品廕生運同銜湖北候補同知秀實以廕
賞主事官工部營繕司來以銘請銘曰

武水環帶天門隆崇地氣鬱雄生我楊公楊公我我家
服健勁關機銜刀以礫梟獍忠義激發鬚髯奮張孰謂
公老萬夫失強屹矣鄂疆喋血周歷滔滔江漢詠公之
績致身成志瘁於道馳 帝獎賢勞三軍泣思池蓬之
碧毘羅之阪我銘公幽維以示遠

惠州范公祠碑

光緒十一年番禺梁君鼎芬以言事謫歸惠人延長其
郡書院君至惠卽修蘇公軾祠復將爲祠祀汝南范公
孟博惠人旣尊信君而服其教謀議大和歡躍趨赴維
月若日工用咸訖以告先謙紀其事方漢之末造羣小
當路亂階已成公起自薦辟事不越三府獨立廉尙以
正薄俗厄於時艱海內冤痛其沒而爲明神歆享祀宜
也梁君以爲蘇公幼讀公傳以他日許爲公與否請於
其母由是奮厲有當世志蘇公忠節出性成而遷染之
塗惟公相啟迺推原本始奉祠於公俾惠人登二公之

堂瞻拜流連考鏡前美慨然動其誦讀尙友之心可謂
善教也已黃山谷之謫宜州也有求書者默寫公傳與
之或驚其彊記山谷曰如此傳豈可不熟讀蓋公之志
行能使後世學者羣奉爲師彌久如一日而人臣砥厲
名節不得於時者亦或託公以見志推梁君爲祠之意
豈與山谷異邪或曰公未至惠何祠之爲先謙曰古之
爲神者靈昭一方有功德於民則祀之非鬼而祭斯謂
之諂德義者天下之公器也不以域限不以迹拘其於
人心無時無地而不在也賢聖之徒躬踐至道不隨死
而亡故天下後世相與敬慕勿替惠人之思公也至則

其神於是焉享矣。蘇公爲潮州韓文公廟碑言公神在天下如水在地中無往不有。辟鑿井得泉水不專在是也。夫以韓公至潮而神不專在潮。知公不在惠而神未嘗不至惠也。歐陽文忠未至杭州僧惠勤思之所居有甘泉涌出遂名曰六一泉。六一居士者文忠自號也。惠勤以謂居士精神無所不至。故雖不至杭而可以其號名泉。其說與鑿井得泉之喻相發而於惠人祠公之義有懸合者。然則謂公之神爲天下甘泉可也。鑿而名之自梁君始矣。迺爲詩曰

挺挺義人邁時泯。勞勤職樹績自燔。以芬弗枉我道弗

汗我潔弗有我躬用壯臣節奮乎百世聞風競興不愧
首陽公言有徵惟我惠人高山斯仰惟此廟貌擬自院
長院長之教勇以成仁惠人之率承楷於神是瞻是則
出處勿忘育爲名材以贊 廟堂神其有愉毋怠報祀
聲詩於石下詔無止

太子太保陝甘總督世襲一等輕車都尉楊勇愨公神道碑

公諱岳斌元名載福字厚菴善化楊氏元籍乾州曾祖昌文祖勝儒乾隆末以團練從勦苗賊有功殉難永綏王瓜寨長子秀思從死祀乾州昭忠祠次子秀貴用廕補官仕至直隸獨石口副將公之父也三世皆以公貴贈光祿大夫曾祖母龍祖母向母向皆一品太夫人公少習弓馬精技擊由行伍於道光二十六年補湘陰外委從平新甯亂民李沅發敍藍翎咸豐二年粵寇犯湖南趨湘陰長官以出防爲名先期避宅所公率營兵登

陣捍禦城賴以完曾文正公國藩治水軍衡州聞公能
檄至營令與彭剛直公王麟佐其弟貞幹軍事時公擢
宜章千總彭諸生也貞幹請於曾公曰是二君者吾觀
其部分諸事皆大將才非從人俛仰者也於是曾公益
知公果賢令將水軍右營而彭公將左營金陵踞賊上
犯陷湘潭公與彭公以水軍八百人會陸軍進攻被數
傷戰益奮連勝復湘潭曾公帥水軍會陸軍東下公爲
前鋒敗賊雷公湖復岳州賊至再破之手刺殺僞丞相
汪得勝追至道林磯又大敗之賊聯踪上犯水軍統將
戰沒 特命公管帶各船自城陵磯擊賊抵陸磯口盡

平賊壘窮接港汊至黃蓋湖受傷墜水躍入它舟大呼
突陸賊盡披靡肅清內湖以達金口遂克武昌漢陽乘
勝復沿江郡縣賊踞田家鎮半壁山橫鐵鎖江中護以
舟筏曾公定策毀鎖公令曰吾焚其在之前之船則後者
遠竄若窮追數十里自下游延燒而上賊可殲也及鎖
斷賊舟四散公率所部疾駛三十里至武穴東南風大
作公回棹縱火四千餘舟一時俱燼陸軍亦盡破岸賊
捷聞上以公勤勩最著溫旨嘉獎公積勞嘔血
請假回籍而曾公水軍挫於九江其半陷入湖口曾公
赴江西整理彭公等畱將江上於是水軍有外江內湖

之分五年武昌漢陽再失彭公等回援 上詔公速赴

湖北曾公檄彭公赴江西巡撫胡文忠公林翼奏以水
軍付公選汰稱公忠勇廉明志識尤高時公已官至鄖
陽鎮總兵換花翎 賞彪勇巴圖魯名號 上遂命兼

署湖北提督公迭破賊金口沌口南岸背鮎魚套鸚鵡
洲六年燔漢陽賊舟淨盡逆擊黃州來犯之賊直至九
江還破安慶濟糧援賊再克武昌漢陽會陸軍復武昌
黃州獨以水軍復蘄州悉奪九江以上賊舟七年曾公
丁憂 上命公總統水軍而彭公協同調度公與彭公
密期同舉克湖口及梅家洲偽城於是江湖水軍復合

爲一公畱軍復彭澤小孤山自率所部疾趨下撕馬當
埽華陽鎮剋望江拔東流掠安慶掇銅陵耀兵舊縣之
夾口以鹵獲盡犒江南紅單船水軍捷聞諭獎其
謀略過人授福建陸路提督命專摺奏事九江平

賞黃馬褂交部優敘調福建水師提督公再克東流進
偏安慶分兵復建德降池州賊渠韋志俊陸軍挫於三
河賊勢大張公扼防江介近守遠攻霆擊電駭賊無敢
逞設資遣局於東流收撫降賊難民十三萬餘人十年
解南陵圍拔出軍民十餘萬人會曾公克安慶賞雲
騎尉世職遣將連復池州銅陵無爲諸州縣乞假省親

特詔慰問親病 命速赴營賊渠石達開犯乾州公

捐貲練團大修礮械率以城守賊聞風遁同治元年回

營 上以大軍進圍金陵 詔赴沿江下游妥籌布置

大破蕪湖金柱關援賊盡燬東壩賊舟會陸師復二浦

克九洑洲長江肅清與彭公會克金陵附近城隘長圍

合矣以親病乞養不允賊渠黃汶金等犯江西皖南

命督辦江西皖南軍務授陝甘總督金陵平 賞太子

少保銜一等輕車都尉世職時陝甘回氛熾甚境無完

土咸知非大舉不爲功而粵撫交訂中原鼎沸調兵請

餉迄不能應公肅清江西後提卒五千以行甫抵陝

朝旨敦迫赴蘭州諸軍在甘者相率譁潰省城標兵繼
變公往來填撫艱苦萬狀麥石直銀百七十兩諸軍饋
餽不至以麪水充飢激厲拊循指揮四出破賊漳縣通
渭皋蘭諸屬境復洮州陝回犯秦州赴南路督兵擊敗
之運道以通解涼州圍肅清慶陽河狄賊回襲鞏昌迎
擊破之走古浪平番之賊疏通西路糧道而嘔血日劇
瀝情乞休 上鑒其誠 特允解任 累詔詢病狀十
三年 命來京光緒元年入都叩謁 梓宮請回籍侍
養時設長江水師專轄江防提鎮以下皆公舊部 上
命公巡閱長江與彭公往來督察尋請開差使畱籍終

養迭次 賞假五年復請 允之七年丁父憂法越璧
擢海防戒嚴 命赴福建辭不許 詔幫辦江南軍務
法兵踞臺灣基隆改幫辦福建軍務先是公在軍 特
賜珍物者一先後 賜福字佩件食物者十 賜其父
母人蔭 御書扁額各一是歲 皇太后萬壽以公奉
詔治軍不遑將母太夫人復拜 御書扁額大段如
意袍鞋料之 賜公乘閒渡臺周歷海口士民歡躍助
餉百萬十一年和議成回籍侍養十二年繪像 紫光
閣十三年丁母憂十六年六月二十七日卒於乾州距
其生道光二年十一月初九日春秋六十有九妻乾州

羅氏 誥封夫人子三正儀花翎二品頂帶署福建督糧道懋儀江蘇候補道潛儀縣學生花翎道銜候選郎中女一適長沙易宗銘孫男七鎮榮縣丞道灋道瀝道潛員外郎銜道洪道濂道源孫女五曾孫女一公與人恂恂一接以和敬終身不見武怒之色在軍論功退若無與雖病劇未嘗自言勞及臨戰陣踔厲發不測若鬼神水軍初興以牛皮魚網縕絮之屬自扞蔽公一掃去之曰賊亦人耳吾奉 天子威靈以忠義爲甲櫓理無不勝咸豐五年城陵磯之役以三日平賊巢二百餘里六年九江之役十日之內往返千里七年舊縣之役

月餘轉戰亦千餘里。論者謂赴機之捷古名將未有也。
○奉○命○渡○臺○法○人○以○巨○艦○阻○海○時○用○西○法○電○報○奏○事○取○
○迅○達○紆○朝廷○憂○然○動○靜○輒○爲○敵○訶○知○公○密○備○輪○船○於○
○泉○州○海○口○以○請○緩○師○期○電○奏○卽○於○其○夜○乘○民○船○趨○海○口○
○徑○渡○逮○奉○旨○督○責○則○渡○臺○已○久○公○嘗○言○兵○機○萬○變○妙○
○用○特○一○心○時○會○所○迫○但○令○於○事○有○濟○不○必○遽○求○諒○君○
○父○其○智○勇○深○沈○皆○此○類○也○遺○疏○聞○上○軫○悼○贈○太○

子太保照總督例

賜卹

予諡勇愨立功省分建祠

事蹟宣付史館立傳

賞潛儀舉人鎮榮知縣道讓及

歲引見公自少卽能詩軍務旁午不廢翰墨感時撫事

輒流篇什有集若干卷尤善書臨摹閣帖書譜皆極神
似得者寶之然未嘗以文事自憙其意度宏遠矣十七
年三月葬善化河西鄉白箬鋪西五里墩蓮花塘之月
形山正儀等涕泣請銘其墓道之碑迺爲銘曰

大亂之生以顯奇傑金田葉身楚材所鏤舟師勦建拓
規曾公銜刀浮江水中兩龍彭實桓桓公尤嶽嶽卷浪
排山如風埽釋鯨鯢就翦江波鏡清挈三千里還之
帝廷度隴越閩我勞敢告精誠格天卒完忠孝出摠師
旅萬夫之雄歸視羞膳孺慕融融助亦云崇福亦云備
榮養克終大星繼墜子臣冠冕河嶽英靈我最其迹用

詔千齡

兵部左侍郎郭公神道碑

公諱嵩燾字伯琛筠仙其自號晚更號玉池老人築室曰養知書屋學者又稱養知先生湘陰郭氏余昔爲公弟意城先生碑銘旣詳其世系矣公自幼端慤有成人之度稍長游學嶽麓書院與湘鄉曾文正公國藩劉公蓉相友善切劘以道義於書靡不通究雖蓬戶獨處其意淵然以天下爲量尤自厲勤苦質直好義必忠必信矢之終身蓋其得於天性與自力於學者如此由縣學生中式道光丁酉舉人丁未成進士改翰林院庶吉士回籍丁父母憂粵寇起犯湖南曾公以侍郎居憂奉

詔辦理團練未出公至其家陳說大義曾公感動起視
師時苦費絀公爲親歷郡邑勸捐濟饑並請於巡撫開
鹽釐捐局商定章程大局遂振賊圍江西省城公率勇
馳援言於江忠烈公忠源賊踞江路勢盛官兵無船宜
製戰船備攻剿江公韙之公爲草奏奉 旨允行後曾

公用舟師踣賊金陵由公發其端也江西圍解論功授
編修回京供職入直 南書房咸豐九年隨科爾沁親

王僧格林沁辦理天津海防 賞花翎 命赴山東海

口察辦稅務引疾歸同治元年 特授蘇松糧儲道

擢兩淮鹽運使 賞三品頂帶署廣東巡撫嘉應州賊

平晉二品頂帶五年解任十三年 特召赴京光緒元年授福建按察使尋 命以侍郎候補在總理各國事務衙門行走充出使英法大臣補兵部左侍郎差旋抵滬以病免公之官運使也時庫儲垂罄兵餉積懸公具詳總督請各營配鹽由運司掣驗提督李世忠擁重兵行私鹽莫敢何問公遣人緝獲入官運政大暢餉給庫充粵盜艇多師船與盜比爲商旅害公別造戰艦領以能將破東江石龍盜村遂收汰師船次及西北省河悉斂歸官歲省餉十餘萬裁釐卡以杜中飽增入數十萬別庫儲捐罰款不領於經費者糧道司之兩歲亦積二

百餘萬其綜理精密多此類嘗以國朝二百年來休養生息民物熾豐聲教訖海外環地球諸國羣集戶庭非撻伐所及既以違言積釁隱忍曲全臣子與國爲體當深思因應之宜力戒宋明紛呶積習以弭近憂而宏遠謨故其與外人交一持公誠屏氣矜罔不歸於和劑於必應辨難者仍據理直爭無段借西人咸敬服焉自海外歸十三年以光緒十七年辛卯六月十三日卒於家距其生嘉慶二十三年戊寅三月七日年七十四夫人同邑陳氏繼室太倉錢氏妾周氏鳳氏梁氏李氏子三剛基陳出能文早卒焯瑩鳳出縣學生立瑛梁出

女五適左周李其二殤孫本含本謀縣學生曾孫道傳
道伊公廉介不苟得任運使時書吏白收數倍前相什
例可支匣費萬餘金公曰此偶然耳卽久任未必能如
是行事當令後人循守今多取後援爲例迺階之厲也
不許出使三年取諸公者唯薪水屋租二事律已厚而
待人寬嘗言廉者君子以自責不宜以責人惠者君子
以自盡不宜以望於人時以爲名言歸後主講城南書
院兼闢思賢講舍曾公祠東祀船山王子與學者肄習
其中啟迪後進如不及尤以扶植善類獎拔孤寒爲己
任歿後多流涕者生平撰箸大半散佚存者禮記質疑

四十九卷大學質疑一卷中庸質疑二卷訂正朱子家
禮六卷養知書屋文集二十八卷詩集十五卷奏疏十
二卷讀書記若干卷湘陰縣圖志三十四卷會合聯吟
集一卷家譜六卷已刻行其未刊者周易釋例四卷毛
詩餘義二卷綏邊徵實二十四卷官書若干卷尺牘若
干卷公自卜兆縣東七十里飄峯山首已趾亥葬以歿
年九月九日焯瑩等涕泣請銘其墓道之碑迺爲銘曰
謂公弗顯聯翩節麾志業宏多欲如未施眾榮我蔑趣
與世睽思以先覺覺彼後知利在國家豈圖其私蠻
貊可行州里或疑匪誠未至人心積蠱 召歸輟駕邁

疾江湄。天日掩照時。命孔哀。心不負。君魂清魄夷。
孰聞天馬徒戀敝帷。皦爾風節百世之師。文章滿家鸞
鳳其儀。謗與身滅。積久彌輝。攷三不朽。視此穹碑。

江蘇巡撫黎文肅公神道碑

公諱培敬字開周簡堂其自號晚更號竹閒道人湘潭
黎氏曾祖祚廣祖大純縣學生父光濤以公貴三世皆
贈榮祿大夫妣皆一品夫人公生七月而孤太夫人以
純孝苦節鞠育成立由縣學生中式道光己酉舉人充
覺羅官學教習咸豐庚申恩科成進士改翰林院庶
吉士散館授編修同治三年甲子視學貴州時黔亂十
餘年郡邑糜爛前視學者居省會希出按試候三年得
代去爲幸命下人皆弔公慷慨就道開行抵省適勞
文毅公崇光以雲貴總督駐黔與巡撫張公亮基議論

不相下公以疆吏不和貽誤大局吏治廢弛軍政積窳
密疏馳聞當是時言黔事者多依違不敢盡奏入朝
廷始悉邊陲情實以忠直多公公初至貴陽時疫道殣
賊距省近官吏語及試事變色莫應公以爲人心不靖
繇士氣不伸考試必毋緩卒舉行之一切捐備畢試眾
心帖然自是按行諸府州出入賊氛中道閉則緣粵楚
蜀邊以達人多自賊中鬚髮出就試公策騎從吏僕數
人與士子開說忠義宣朝廷威德風亂黨捐奉助饟
倡修獨山銅仁城而黎平永從漢苗民不和守令請毋
冒險重生事公弗聽嚴諭漢人毋溷苗籍入灑洞大酋

梁維幹子武學生古州楊嘉相者軍帥招以二品職銜
不應至是入學充拔貢生苗人大驩六洞之亂遂定於
是人憬然知國家德化入人深學校繫治理甚鉅然
非公忠勇奮發明識內斷孰肯犯危難以赴眾論之所
不急益相與頌美公或封章上聞而公之大用自此
始矣任滿奉旨毋庸更換會同巡撫辦理勦撫屯田

事宜六年十月賞四品頂帶署布政使而曾文誠公
璧光以清德雅望權任巡撫兵饟事一委公公建議龍
里貴定爲賊窟偏省城宜急勦時經費無出遣人開諭
青巖民集捐米二千石籌貸獲數千金募勇督攻遂克

兩城殲賊渠省城解嚴繇是覈軍需汰浮冗裁營兵虛糧清荒屯墾奏免積逋嚴吏役橫征之罰民困以甦丁糧漸集又葺諸書院復膏火舊章請補鄉試興文廟樂舞以邊隅貧僻爲廣購經籍逮牧令律例醫藥之書罔不畢備各城門爲粥振饑每晨必周歷而嘗焉蓋公仁厚出於天性而精彊足以濟之其於財用綜察不遺至當理者未嘗吝出始受事庫存八十金及交代儲十萬有奇雖上下游賊平倚濟鄰省而挈提綱維聯絡將率鉏姦固圉僉曰惟公之功以龍貴之捷 命實授誅不

法武員林自清

賞花翎十一年全省肅清加頭品頂

帶光緒元年擢巡撫疏言下游形勢苗南漢北驛道由西而東爲大界苗亂先梗驛路旁擾橫決遂爲巨害宜建礮屯兵衛通衢盡地利又言黔省兵米採買輓運法久弊生私折虛收冒領運費或蝕價肥己責苗交納寢成亂階宜折銀發營兵自購食其輓運一律折徵解庫轉發又請設平民待質所官給口糧並得旨允行爲地方久遠利四年以臚陳故總督賀長齡政績乞恩降調授四川按察使旋擢漕運總督調江蘇巡撫未行以疾乞休八年七月五日卒於長沙距其生道光六年七月十日年五十七遺疏入賜卹如例事蹟付史館

尋予謚文肅公之左官蜀中也人妄意或有觖望精勤且少遜而公於驛傳保甲事爲之制恤刑清訟惟日不足及督漕河益感激自厲至則堵禮壩以固河隄運官煤以平輦價建堡駐兵以衛行旅設洪湖水陸保甲造東海鹽城領江八團戰船捕誅徐海巨盜充積穀興蠶桑恤貧振災增課惠士不有其財以溉轄境甫八閱月百廢聿興雖任事不如黔久然兩地士民謳思感泣並請建祠以祀元配楚夫人繼室王夫人子六錦纓廕生光祿寺署正楚出錦彝縣學生承禮舉人錦績早卒錦綺錦徽俱王出女七適齊適何字魏字譚餘殤孫男

四澤潤縣學生澤澍澤源澤準俱殤公任黔藩時屏絕
苞苴每曰亂之生由廉恥先喪也有饋筍者怒責之舉
以誠屬吏由是人莫干以私嘗遣僕歸葺舊居諭母更
制暨歸見門閭高大立命徹毀如故其操履清嚴如此
卒後錦彝等采其遺書爲年譜一卷奏議十六卷公牘
十卷書札三十卷黔輶紀程一卷求補拙齋詩文略各
二卷外集四卷以光緒某年月日葬湘潭某原錦彝等
來乞余文迺最其落落大者俾樹石墓道昭示無極銘
曰

大亂之肇繇吏怯貪懿矣貞臣視荼若甘公之初出輶

虛受堂文集

卷九

三

車指南萬眾疑沮鎮以笑談敷文自昔格苗匪今青青
衿佩我往嗣音聲教遐暢羣頑革心遂宏大化以靖全
黔辱亦不驚仕固無喜于川于淮比潤千里浩然剛大
隨處必伸世所榮利不加其身名蹟孔多馨香靡極有
揭于原百僚之式

陝西忠義墓碑

代

劇寇煽粵踰領突湘浮江而南流毒徧海寓獨湖南以
中權屹立既完既固俾賊首尾衡決不得返顧窟穴卒
用一隅全力厲兵集賦扼亢而踣之論者歸美中興
材桀之盛及當日城守捍衛之堅至於率先犯難駢首
蹈刃擲千百性命於須臾之間而關繫天下安危全局
之大者世或未之知也方賊由醴陵犯長沙剽銳甚陝
安鎮總兵福誠公潼關副將尹公培立奉大府檄各帥
陝兵千屯距南門外十里之后馬鋪會城晏然謀者馳
報陝兵與賊鬪始急火城外廬舍塞闔登陴日夕賊至

通得福公等全軍戰沒狀賊之至石馬鋪也官軍壘未
就倉卒出擊賊少退俄列隊十餘來攻福公尹公分軍
禦之戰三時許死傷枕藉無卻者賊黨自後鈔擊軍遂
潰福公尹公馳殺數十賊死之從者甯陝營參將薩保
以次將弁四十五人兵七百一人咸豐二年七月二十
七日也當是時微陝軍力戰扞賊長沙幾殆長沙不保
賊由粵直下數千里道無梗者勢愈不可制而兵餉之
源潰散決裂雖有石畫之臣廉恥之將其焉所取資故
陝軍死事之績歷久彌章其事感動人心尤至云余服
官湘中憑弔戰所見忠骨叢葬崇封歸然而碑記闕如

悲。遂。泯。沒。爰。最。舉。顛。委。敘。而。論。之。以。揚。義。烈。諗。來。者。迺。
爲。銘。曰。

小。戎。舊。俗。慷。慨。猶。存。勇。氣。自。古。皇。風。載。振。巨。奸。漏。罔。
鳥。集。于。楚。桓。桓。虎。臣。爰。帥。我。旅。執。父。前。驅。壓。軍。遽。陳。干。
夫。一。心。有。死。無。遞。天。未。弭。亂。士。元。以。喪。風。悲。同。澤。騷。泣。
國。殤。戍。人。之。災。邑。人。之。庇。義。義。斯。邱。見。者。欽。恤。表。以。貞。
石。萬。禩。不。磨。雄。魂。毅。魄。永。奠。山。河。

河南忠義墓碑代

咸豐二年七月粵寇犯長沙分黨取湘西禾屯援賊牛頭洲上河北鎮總兵王代琳與都司姬聖脈帥河南營兵從提督向榮擊之中賊伏潰聖脈死焉榮代琳跳而免先是河北鎮總兵董光甲以河南兵勦賊粵西之大崗光甲戰歿部曲多喪軍士慟憤故是役爭先致命將弁死者三十一人兵四百五十餘人時九月十九日也越四十二年余陳臬是邦憑弔鄉人死事之所見荒冢纍纍慮就湮滅重加修護爲文以章之牛頭洲古稱橘洲者也銘曰

咨爾汴人我邦桀從征于南氣勇決奉揚皇靈埽逋
孽于粵于楚鋒再折湘洲叢叢慘同穴精魂激盪水鳴
咽父悲母咷兒叫絕靡家靡室甘伏節壯我鄉國士有
竭孔哀且嘉表茲碣更千億齡江不齧

誥授光祿大夫經筵講官工部尙書兼管順天府府尹
事務祁文恪公神道碑

公姓祁氏諱世長字子禾敏齋其自號先世系出春秋
祁大夫之裔元季自山西洪洞徙壽陽壽陽古馬首祁
氏七邑之一也曾祖文汪優貢生長治教諭祖韻士乾
隆戊戌進士翰林院編修歷右中允改戶部郎中父寯
藻嘉慶甲戌進士官大學士道光咸豐朝軍機大臣同
治初授 穆宗讀卒 贈太保謚文端入祀賢良祠三
世皆光祿大夫妣皆一品夫人文端公督學湖南而公
母陳太夫人誕公長沙官舍幼耆深湛之思每講解古

訓大義豁然立悟年十三隨侍江蘇學署文端公用樸
學倡導後進一時幕府若俞理初苗先路張石州胡光
伯諸先生訓詁攷據輿圖之學競號專家公一見能領
其要聞然內修不以通敏先人被服儒素造次必於繩
墨冥心孤詣所得於宋儒性理獨多石州贈詩云垂老
媿黃童蓋其爲耆碩推重已如此咸豐辛亥由廕生授
戶部員外郎 特旨召見垂詢家世迴避改工部旋中
式舉人庚申成進士改庶吉士授編修丁文端公憂
特旨以侍讀候補服闋補翰林院侍讀四遷至禮部侍
郎先後署兵刑部調吏部筦戶部三庫事擢左都御史

工部尙書兼順天府尹公之爲曹郎也文端公方直樞密公莅事維謹處同列無倨色無墜言文端公以疾乞休不關家事值寇亂久計捐奉入助軍餉公力贊成之然家寶無餘怡顏戶庭處困彌歡文端被詔再起授書殿廷公供職詞垣出則左右趨承入則隅侍論學清風滿室充然各有自得之容人以爲東漢桓氏父子醞藉敦厚之美莫能尙也旣以清望躋顯秩見時事孔棘感激益奮光緒初簾聽孜孜使臣肇釁俄恣要挾公則有守經行權或合於權宜離經行權必累於權詐之疏諒山罷戰與法連和公則有急攬人才維繫民心

以禦外侮靖內訌之疏籌餉之弊莫甚於借洋款有展
轉剝削恐傷元氣之疏富強之計不在專習夷務有請
停開鐵路之疏礦廠寢多流弊滋甚有養地利清弊原
之疏往往朝入造膝夕歸削牘根本獨見務達其誠不
肯逞詭激以沽名驚新奇以諧眾凡所開陳多見采
納充經筵講官賜紫禁城騎馬先後命會辦山
西團練察辦山東事件凡督學安徽順天浙江主湖南
鄉試一會試二武會試鄉試各一殿廷試輒與閱卷
蓋上信公忠正廉慎倚任日隆公亦行無越思職靡
曠事尤工文章精衡鑒崇雅黜浮杜絕私謁凡所識拔

多名於時以光緒十八年壬辰八月六日卒距其生道光五年乙酉六月二十九日年六十八遺疏聞上軫悼 賞經被侍衛奠醑 賜卹如例 賞銀五百兩治喪長孫師曾卽補員外郎子友蒙及歲 引見尋

賜祭葬諡文恪配同邑李氏封一品夫人先卒側室張氏宜人子三友慎李出二品廕生 欽賜舉人內閣中書先卒友蒙友鼎張出二女皆先卒孫二師曾一品廕生師儉曾孫一某遺集凡奏疏若干卷文若干卷詩若干卷公天性純篤先人忌日祭祀豐絜致敬盡哀有終身之慕而自奉不四簋一裘十餘年當官絕苞苴有餽

必拒親族故舊恩誼周浹對家人若賓客詞氣無遽疾
暑不袒坐不欹門生屬吏虛懷傾接務盡其懽雖竟日
端凝而卽之藹如可謂卓然有道君子矣先謙蒙被公
知以道義文章重相期勉歲乙酉奉視學江蘇之命
公出家藏文端公寄園消夏圖指示幼時隨侍及諸老
談讌之所且曰園今燬矣圖中事依依垂五十年顧念
前徽猶潸然欲泣也先謙到官捐奉葺園爲文寄公追
任滿假歸而公遂不可再見悲夫師曾等郵書走狀屬
文其墓道之碑先謙曷敢辭迺爲銘曰

道本一原岐分漢宋理責躬行文資貫綜咀華落實同

體互用仇嫉憤攻俗儒一閥繫公家學鄭伯朱仲純厚
稟天夙成驚眾平持衡石一掃雰雰蔚起詞林挺爲
國棟秋輶四駕春士再貢虛公厥心學子流頌公之進
思從容議諷籌策時屯息長哭慟公之退食規矩曲中
道味在躬水止山重表裏融明質文斯礪如何一老遽
踐夜夢懷有遺章室無畱俸深宮嗟惜萬口悼痛小
子承顏如鳥慕鳳步趨在目琴瑟罷弄仰歎周聃俯慚
衛贛鐫詞章德百代欽誦

誥授光祿大夫貴州布政使李公神道碑

公姓李氏諱元度字次青一字笏庭自號天岳山樵晚
更號超園老人其先出唐太宗三子吳王恪後遷江西
建昌石晉天福中再遷湖南平江爲縣人曾祖自芳縣
學生祖家庚從九品父傳祁府學生母喻氏旌表節
孝以公貴三世皆 贈光祿大夫妣皆一品太夫人公
生有異稟四歲而父歿稍長讀書過目成誦年十八爲
諸生食廩餼中式道光癸卯舉人會試報罷遊奉天學
政幕 陪都尊藏 列朝實錄公得以仰闕美富通知
一代政事本末又隨使車徧覽關東形勢浩然有得益

肆力掌故地理之書旁稽百家載籍才識宏裕 大挑
選授黔陽教諭咸豐二年粵寇破武昌而東曾文正公
國藩奉 詔在籍團練公上書數千言隱其名曾公燧
之既相見詢知公所爲大驩曰吾固知非子莫辦引與
規畫軍事岳州師潰曾公敗於靖港部軍捷於湘潭賊
返竄 詔落曾公職戴罪督剿故事革員例不專奏公
代草疏請出湖南境後仍專奏以速戎機曾公疑焉公
力持之得 俞旨奏保知縣加內閣中書銜復武昌克
田家鎮加同知銜 賞花翎水師敗於九江曾公入南
昌公相從艱危中多所裨助曾公自出師迫不利輒奮

卽死皆以公防抹免五年公自請於曾公募平江勇爲
一軍破賊蘇官渡會水師克湖口賊酋石達開據撫州
瑞臨袁吉諸郡皆爲賊有六年公克東鄉攻撫州累戰
皆捷分軍西循復宜黃崇仁值皖賊來援戰不利退保
崇仁七年曾公檄公守貴溪兼控閩浙要隘大捷於鷹
潭加知府銜敗石達開眾鉅萬擢知府以道員 記名
八年石達開竄衢州道出貴溪擊走之分兵解衢圍移
防玉山及廣豐常山間賊犯廣豐襲玉山公廣設方略
賊窮竄伏兵邀之大獲江西巡撫疏稱以三千饑疲之
卒當悍賊數萬自有戰事未之前聞爲時推重如此先

是曾公憂歸爲書勞公曰君當靖港敗後宛轉護持入則懽愉相對出則雪涕鳴憤一不忘也九江敗後特立一軍志在護衛水師保全根本二不忘也樟鎮敗後我部別無陸軍賴君支持東路隱然巨鎮力拄絕續之交以待楚援三不忘也至是再起視師遂上公功加按察使銜 賞巴爾固楞巴圖魯號胡文忠公林翼疏舉賢才公與沈文肅公葆楨左文襄公宗棠首列焉十年金陵師潰曾公爲欽差大臣總督兩江檄公守廣信衢州授浙江溫處道曾公奏調皖南道改防徽州公率新卒三千以行八月抵徽先數日甯國陷賊酋李侍賢眾十

數萬來犯舊防兵潰環索餉寧防兵踵至大掠公善遣之賊犯績溪叢山關部將童梅華等往禦賊入關梅華擊走之遇伏歿關遂失賊薄徽城周十八里傾圯甚公督修三晝夜完三之二而賊至曾公所遣援兵潰公收兵登陣賊環攻五日北門不守公馳往督戰墮馬暈絕爲親卒負出城遂陷事聞上意雖欲罪之然有李元度謀勇兼優人才難得之旨命曾公察奏曾公疏請褫職逮治而浙撫王壯愍公有齡請公募勇赴援十一年命曾公飭赴浙應得罪名仍察辦公歸里募八千人爲安越軍會賊酋李秀成連陷湖北江南郡縣湖南

大震潰官民固請畱守平江六月公自湖北轉戰而前賊望風遁連復通城崇陽蒲圻義寧新昌奉新瑞昌諸城詔賞還按察使銜再賞布政使銜前罪應否寬宥命曾公覈奏九月次衢州浙餉不至稱貸以行敗賊雲溪峽口葉村等處道梗迄不得前十一月杭州陷同治元年李侍賢犯江山公力戰挫其鋒復分軍與左公會擊大破之授浙江鹽運使晉按察使署布政使而曾公以公罪未定遽回籍疏劾褫職畱營命交左公差遣公遂歸尋言官論劾復命曾公左公察實具奏時金陵已克曾公奏公守徽之役到不十日巨賊猝至

兵力未厚前奏逮問本從嚴今大功垂成請量錄用左
公奏杭州失陷非公逗畱所致惟落職後求去索餉不
顧大局 詔遣戍仍畱養母貴州教匪嘯聚思南石阡
與苗賊應和蔓延楚蜀五年巡撫張公亮基奏起公專
辦教匪公募平勇二千督各軍由銅仁進攻克大小壘
八寶關大園子馬鞍營席家山諸堅巢大捷於孟溪解
銅仁圍教匪居河西者曰城頭界曰老團曰環嵒曰秦
家寨曰大堡曰景陽洞曰牛渡灘曰嵒科居河東者曰
荆竹園在安化縣北其酋朱明月踞湄川縣之偏刀水
公勦設水師斷東西互援進規河西六年克城頭界老

團環崑諸巢東會席公寶田軍攻荊竹園三道水七年
正月克之分兵克秦家寨走教首劉儀順擒朱明月於
覺林寺五月拔偏刀水擒僞王何繼述田應武老教主
王科等以降人內應克大堡景陽洞而牛渡灘崑科乞
降兩年之間剿撫九百餘寨廓清五六百里設屯田局
招丁三千授田二萬餘畝教匪平屯政亦竣 詔復原
官授雲南按察使陳情乞養 允之光緒八年母卒服
除十一年入都補貴州按察使十三年遷布政使在黔
翦巨惡劾墨吏興蠶桑設礦局前殉賊難者自貴州提
督孝順公以次爲請建十忠祠而恤其後裔宅善政多

可紀以九月二十七日卒於官距其生道光元年八月二十五日年六十七湖南巡撫奏附祀曾公祠事蹟宣付國史 詔如所請妻同邑喻氏 封一品夫人妾徐氏吳氏宜人子五積琳花翎三品銜江西候補道積璠同治癸酉拔貢花翎四品銜兵部員外郎先卒積璿縣學生積瓚積瑄女七適黃錫綬彭樹森沈瑩慶曾廣銓郭焯瑩歐陽鈞張壽威孫八厚荃府學生厚蓀候選道厚英厚葵縣學生厚芬厚萃厚江厚藩孫女八曾孫一曾孫女二公性純篤事母逮老如孺子厚於親族塾有課縻有資姻故鄉鄰多待以舉火平江地界三省設局

縣城集械編丁以時訓練寇警迭乘恃以完固立諸善堂及廣仁倉貸不取息荆建平江忠義祠及葺新諸祠祀必親必慎倡捐江西欠餉二十餘萬請增府學生額宅軍效之省帑千萬自少以文鳴既老於兵間聞見開廣益雄於詞所著有 國朝先正事略六十卷平江縣志五十六卷平江十三君子事略二卷十忠祠紀略二卷南岳志二十六卷天岳山館文鈔六十卷未刊者四書廣義六十四卷 國朝彤史略十卷名賢遺事錄二卷 國朝先正文略二百卷求實用齋叢書若干卷安貧錄四卷古文話六十四卷天岳山館詩集十二卷文

續集若干卷四六文二卷以光緒十九年四月葬縣南
水南里丑首未趾積琳等泣請文其墓道之碑先謙少
公二十年自公貴州軍營歸里始相識一日過先謙書
齋見所爲明大學士史可法補傳誦之再曰君有班范
才幸努力由是以文字相知好意氣許與至今不忘銘

曰

公之文章足以潤色廟堂而不操史筆才猷足以參贊
密勿而滯於外官武略足以取侯封而蹶於任事之勇
忠誠足以信朋友而不免同心之責言固瑕纇之有開
亦時命之適然彼古人致歎數奇兮如公者猶可自慰

於九原。

雲貴總督贈太子太傅岑襄勤公神道碑

公諱毓英字彥卿匡國其自號西林岑氏十八世祖子
成明永樂中爲分管上林峒長官司居縣之那勞寨曾
祖正美祖秀岐父蒼松縣學生以公貴三世皆贈光祿
大夫妣皆一品夫人公幼穎異體貌瑰偉誦讀之暇兼
習弧矢劒槊年十七補縣學生值洪楊倡亂土賊擾縣
境公集鄉團擊走之雲南回患熾鄰邑狎警公率所部
於咸豐六年入滇請大府殺賊自效助克趙州紅巖賊
巢自將克宜良之湯池復縣城殲其酋敘知縣權知宜
良縣事會克路南州兼權州事破澂江及昆陽海口賊

擢同知直隸州權知澂江府事時回酋杜汝秀據迤西
其黨連陷楚雄等郡縣偪省城馬如龍者據新興等八
城自陳迫仇殺無反意願就撫會總督引疾去巡撫徐
之銘遣公諭降之獻所據地賊遁走省城以安同治元
年也巡撫奏公代理雲南布政使 賞按察使銜花翎
時省會同人雖就撫與漢民猜忌積深居外郡者叛服
靡常勢鼎沸中原苦粵寇饑不時至公以忠義激厲其
下人自爲戰虛己禮士拔尤器使假以便宜俾盡所長
咸樂效死所嚮有功省中倚公進止爲固如龍旣降巡
撫疏授總兵官然驕很不用命仇臨安參將梁士美用

私憤治兵相攻二年正月回弁馬榮李俊索饒聚譁總督潘忠毅公鐸往諭被害賊據省城奉掌教伯克馬德新爲主謀僭號巡撫走匿公率所部千保藩署及城東南隅瀝血誓眾與城存亡獨親至昭靈觀與賊渠約和請勿擾民馳書如龍責以大義如龍悔釋臨安回援以二月朔夜夾擊賊大破之斬李俊馬德新走新興馬榮走南甯合馬聯陞據曲靖省城復安擢道員巡撫畱如龍省城檄公帥所部西迭復富民安甯羅次嵩明祿豐武定祿勸廣通陸涼南安諸城黑元永三鹽井進攻楚雄分軍赴東路之警克霑益平彝十月克楚雄大姚十

二月克雲南縣趙州賓川鄧川浪穹鶴慶進規大理三年正月克定遠圍鎮南大破援賊普朔而馬聯陞再陷霑益犯馬龍急公畱軍守楚雄自將東七月大破馬聯陞於天生關進攻曲靖八月復馬龍霑益九月克尋甸擒馬榮十月克曲靖擒馬聯陞迤東平 賞布政使銜巴圖魯號自公之東師西路各城復陷賊公計先於東南立不拔之基以曲靖迤東大郡筦會城糧運督軍駐之興學勸農簡練軍伍獨行己意威棱屹然羣回慮爲己害要如龍促公還省公謝言母弟故在藩署吾何容有異心願無信譖言和衷報 國如龍意解五年正月

詔仍署布政使總督勞文毅公崇光入滇公迎謁平
彝詳陳前事之失請入省坐鎮收旁落之權以固根本
用兵先東後西免牽制文毅深然之疏請以如龍專辦
迤西公督勦豬拱箐海馬姑賊報可豬拱箐者隸貴州
威甯州與海馬姑犄角距滇鎮雄州百里苗賊陶新春
陶三春分據之眾十餘萬擾蜀滇黔無甯日三省會勦
不克公條上機宜謂事權分則人不用命請率滇軍獨
任其役限百二十日蕞事文毅與四川總督駱文忠公
秉章皆壯之會鎮雄降賊李開甲漆維新復叛據州城
犯彝良公率五千人轉戰而前克鎮雄斬開甲維新六

年二月次豬拱箐築壘休士諜知海馬姑紅巖尖山前
環大河鳥道壁立豬拱箐入山環合三面嶄絕惟青松
梁一徑通往來三泉下匯山麓爲河山下吳家屯廣七
十里壤沃糧足內間道達海馬姑外設二龍關大了口
小丫口三隘守之惟大溜口徑險僻備少弛公下令分
軍夜趨大溜口出二龍關後襲吳家屯自將攻關戰方
合官軍自關後出夾擊賊大亂連破三隘吳家屯海馬
姑賊來援殪其魁分軍克紅巖尖山進營豬拱箐山半
賊斲千斤巨石圍外而穴其中實藥引繩夜然繩自山
巔推墮火發賊大呼從之燬二十餘營將士多死公督

軍迎擊手刃悍酋賊卻公營故地塹其前石再發墜塹中。公偵賊黨多獮人獮俗連袂踏歌相倡和達情意令軍中獮人環山歌風以解散逸者萬餘獮目王大紅袍降。公溫語接之因獻策曰賊人守地一弓家東南守西北家西北守東南日惟卯酉聲礮傳餐畱一人守十弓地時擊之可破公用其謀親率卒二千昧爽伏賊營外至卯填濠進破木城二重賊殊死鬪縱火乘之斬首二萬禽陶新春散脅從四萬餘合勝兵勦海馬姑力戰克其巢禽陶三春等逾限墮四日滇距京師遠巡撫故昏縱回事棘所爲愈諄亂公異軍特起獨以材見倚然其

時政令歧出疑謗紛然。朝廷方亟腹心未遑邊務巡撫所疏進故弗深信。羈縻而已。公百戰艱難無繇自達。文毅奏入授迪南道克鎮雄擢布政使。豬拱箐平三省大吏入告。賞頭品頂帶。於是公之忠誠勇略天下咸知。上意滋欲大用矣。先是馬如龍西師失利。文毅病卒。杜汶秀乘隙出犯。眾號三十萬連陷二十城。省城戒嚴。七年二月公兼程回援。陽言師出陸涼而取道宜良七甸。毀大小石壩。小板橋。古庭菴。金馬寺數十堅壘。進駐大樹營。通省城運道。解楊林驛圍。鼻受槍傷。破石虎關賊壘。分軍復呈貢。武定。元謀。祿勸。羅次。晉甯。澂江。

諸城三月授巡撫時近省賊壘密布堅不能拔援賊饋
運不絕官軍相持久互有利鈍總督劉嶽昭之師敗於
尋甸退保曲靖公疏陳軍事因言杜逆據地縱橫數千
里進攻宜分三路一由迤南進牽制威緬雲蒙賊援一
由三姚永北斷其鶴麗鄧浪之救一由楚雄鎮雄搗中
堅精兵六萬分番戰守免停兵老師之患省圍解後卽
以鄉勇補營兵額三萬七千餘知兵將領署置鎮協十
二員各爲一路更番迭進餘勇編四十營隨征取之士
著事定歸農免滋流弊並籌備軍實畫定餉需 詔如
所請八年賊增黨數萬復陷楊林分踞小偏橋等處省

城大震公督軍奮擊盡破城東百餘壘分軍克團山楊林城西北壘賊猶死守公遣部將楊玉科李維述分出賊後疾搗迤西馳書獎厲騰越永昌麗江諸團練抗賊者使聯聲勢翦其羽翼賊兼顧不遑次第奔潰至八月省圍解西軍亦克富民昆陽呈貢晉甯易門祿豐安甯武定祿勸元謀羅次定遠大姚楚雄南安廣通諸城白黑琅元永諸鹽井澂江回復叛襲據府城九年公督師圍澂江因奏舉鄉試自乙卯停科至是十九年士民訢訢嚮學樂生焉十年春復澂江親擊東南兩迤負固之賊克竹園江那賊巢勦館驛婆兮田心曰者鄉踞賊皆

殄滅之西軍亦克麗江劍川永北鶴慶賓州姚州鎮南
諸城十一年克永昌鄧川浪穹趙州雲南永平蒙化乘
勝復大理上下關十一月公馳往督勦穴地燬城奪東
南兩門杜汶秀守西北門及內城相抗自率死黨萬出
鏖戰大敗走內城飲藥未死賊黨昇之詐降梟以徇限
餘黨三日繳軍械徙出城賊期以半年公陽諾遣楊玉
科率二百人入城收軍械布兵城外夾擊擒斬僞大司
衡楊榮僞大經略蔡廷棟僞大冢宰馬仲山賊數萬盡
殲汶秀據大理十八載陷五十餘城蓄髮設官僭擬王
制至是平捷聞賞黃馬珪騎都尉世職梁士美佩

強臨安縱反聞於其黨沈朝輔朝輔殺士美官軍誅之
臨安遂定十二年克順甯雲州騰越全省肅清 賞太
子少保改世職一等輕車都尉公自任兵事甘苦燥溼
與士卒同戰則短衣帕首以身先至爲大帥不改其故
滇地瘠苦餉奇絀民感公誠爭輸錢粟每克下城邑資
械給軍散財犒士已無所私搏節持理卒用集事唯是
尤難亂定疏罷捐輸清田畝緩徵收增書院膏火以惠
寒畯滇民所捐千餘萬金廣文武鄉試永遠中額各府
縣學額分永加暫加以培學校又請報捐所部粵勇未
領餉百二十餘萬廣本籍中學額皆 允行十三年兼

署總督誅馬德新於新興令回人母許挾軍械提督馬如龍家所藏亦盡出之如龍驚懼適調任湖南免官後終身不敢入滇於是舉劾官吏訓練營兵興辦銅廠清釐鹽務庶政一新民氣甦復光緒二年四月騰越營弁蘇開先據城叛公討平之丁繼祖母憂歸服闋五年授貴州巡撫七年調福建督辦臺灣海防八年署雲貴總督修舉廢墜尤殫盡心力焉九年實授法國謀併越南越人告急公自請出關進駐興化十年正月 命節制關外粵楚諸軍公懇辭適廣西巡撫徐延旭北甯太原之軍相繼潰散公退營保勝七月奉 明諭與法決戰

公連克越南館司鎮安清波夏和諸縣圍宣光省十一年分軍克緬旺復清水清山二縣粵軍失利諒山不守法酋勃里也援宣光輪舟溯紅水江上公歛軍令道山內行鈔出其後法酋不敢深入公前鋒至臨洮府境阻險爲地營掘土道高下環曲十餘里前隱埤開槍孔上覆以木人守一穴後通往來敵槍礮雨下墜木上不能入間有洞裂穿一穴斃一人而已我軍槍中其酋遂大敗之乘勝破梅枝關克不拔縣廣威永祥二府進規山西河內省粵軍亦克諒山越南義民響應法人懼介使請和 朝命限日徹兵公以五月入邊粵軍亦歸而越

南。遂。爲。法。有。奉。旨。加。一。雲。騎。尉。交。部。優。敘。十。二。年。出。
關。勘。界。兼。署。巡。撫。平。東。川。土。匪。蓋。達。蠻。匪。十。三。年。五。月。
平。廣。南。土。富。州。賊。十。一。月。平。順。甯。屬。裸。黑。夷。酋。張。登。發。
登。發。三。世。怙。亂。據。地。千。里。至。是。戡。定。改。流。官。爲。鎮。邊。廳。
勦。武。定。屬。古。黑。夷。賊。魯。占。高。他。郎。廳。木。戛。寨。土。賊。陳。定。
邦。皆。平。之。十。四。年。生。辰。賜。御。書。額。及。珍。物。十。五。年。
用。歸。政。恩。加。太。子。太。保。五。月。八。日。卒。於。官。距。其。生。道。
光。九。年。己。丑。五。月。二。十。五。日。年。六。十。一。遺。疏。聞。上。
軫。悼。晉。太。子。太。傅。祀。賢。良。祠。事。蹟。付。史。館。賜。千。金。治。
喪。過。所。官。吏。護。喪。歸。葬。子。孫。加。恩。有。差。尋。予。祭。葬。

諡襄勤雲南貴州建祠公弟毓祥毓寶毓琦皆以勞績
歷保至道員毓寶功尤多公卒上擢毓寶雲南按察
使統其舊部公生平篤於師友景慕鄉先達陳文恭公
宏謀展敬祠堂捐貲置產奉祀事遣弁至長沙祭勞文
毅墓貽其子二千金爲祭田費人稱其風義居官無聲
色飲博之好日治公牘暇則觀書逮老如一日所至旁
求民隱農夫牧豎儂獮苗夷皆與接見訓以孝弟問其
疾苦分資酒食歡喜羅拜去或競獻蔬果麋雉滇人雖
婦孺無不知岑公者其忠勤仁智天性夙成可謂偉人
也已妻江氏賴氏一品夫人妾周氏唐氏子男七春榮

河南彰懷衛道春煦河南懷慶府知府春華春熙殤江
出春煊舉人太僕寺少卿春熒湖北糧儲道賴出春蔭
周出女六適唐周劉二待字一殤孫男八德純德復德
溥德崇德新德俊德固德安孫女六以某年月日葬臨
桂縣城東堯山高高嶺江夫人祔春榮等泣請文其墓
道之碑乃爲銘曰

聖清徧德敷天效靈端峯之神感而降精上帝求莫哀
此窮邊孰澹其灾寄命大賢鄉兵蹕起空所倚仰白羽
蒼頭獨來獨往不敢告勞不悔莫知羣邪晦晦十載奔
馳結契宗臣發皇天聽遂總師干以宏威令滇池不

沸蒼洱載清手挈南服貢於帝京中土崩離斧畫幾
斷我民匪公淪爲蒙巽兩移旌節仍復舊圻耆稚歡迎
視公如歸推鋒交州強敵烏竄朝議許成志士增歎傷
我元老霧蒸毒淫如何不弔頽齡遽侵兵戈是非筆舌
譽毀紀實惟詳用補惇史

頭品頂戴陝西布政使 贈內閣學士蔣公神道碑

公諱凝學字先民之純其自號姓蔣氏自蜀漢大司馬
安陽亭侯琬發迹湘鄉爲世著族後裔屢徙至明季有
文轅者自江西泰和還爲縣人公曾祖元咸祖安理父
湘澗本生父湘漣以公貴皆 贈光祿大夫妣皆一品
太夫人公幼孤貧積學不遇授徒自給道光末見亂機
已萌慨然有志經世之務時奸民結會數千人橫行縣
中有司莫敢攖張諭格殺勿論公申嚴族規逮從亂者
至祠數其罪沈之河惡黨誣控於官公詣省求理數年
不歸咸豐初粵寇起大府廉得湘鄉亂狀檄吏嚴捕抵

誣告者罪事乃定二年粵寇犯長沙公與羅忠節公澤南等奉檄練團五年入羅公軍從克崇陽通城蒲圻敘從九品 賞藍翎復咸甯進攻武昌省城敘國子監典籍六年羅公沒李忠武公續賓接統其軍公將湘左營而公子澤灃將湘中營每戰父子先登忠勇稱最軍中以為榮復武昌擢知縣加同知銜從克黃州大冶興國等城圍九江七年分統三營駐北岸陸家觜會將軍都興阿等攻小池口賊城屢捷破援賊童司牌克小池口晉同知加知府銜八年復九江 擢知府換花翎復麻城黃安 命以道員用李公督師入皖公以四營壁蘄

水固楚疆李公戰沒三河舒桐師潰賊踞太湖潛山諸城公營太湖之荆橋遏賊上犯九年與忠毅公多隆阿等進圍太湖賊酋陳玉成來援大破之克其城十年復潛山 賞鹽運使銜會李公之弟勇毅公續宜巡撫安徽公請於楚北大吏解統領以湘左營從李公於青草塢十一年賊復陷湖北郡縣公從李公回援破賊武昌縣復之會諸軍復興國大治諭降蘄州守賊劉維楨令誘黃州賊出伏起殲之遂復黃州 命以道員記名加布政使銜十月苗沛霖叛據壽州霍邱懷遠正陽關三河尖諸城隘淮南北賊圩附之勢張甚李公奏以公駐

霍山六安公懸軍深入破張駿張大佩諸圩進屯六安
克霍邱增募陸軍勦立淮河水師淮南畏威反正者二
百餘圩十二月授甘肅安肅道仍畱營同治元年李公
奏以公督辦潁州防剿至則淮北諸圩相繼歸命沛霖
請納款公責令退還城隘獻壽州正陽關公受其降分
兵駐守 詔嘉獎未幾李公艱歸忠親王僧格林沁令
沛霖助剿亳州撚賊沛霖因構於王請徹退楚師適粵
寇北竄舒桐告警兩江總督曾文正公國藩遂撤壽正
之防移剿粵寇二年正月公迎擊粵寇於舒城殲其酋
又破走之六安三月沛霖復叛圍壽州曾公檄公回援

而部曲分防潁六水軍赴臨淮公以千餘人偕道員毛有銘軍赴援破牛尾岡東皋峯諸賊壘駢斬盈千卒爲水阻圍不解六月壽州陷鑄布政使銜公進營潁西要隘破黃梁集劉家台近仙店陳家集諸圩扼溜子口河道進克潁上縣斬劇賊苗憬和苗憬花復正陽關而沛霖爲僧王所誅三年曾公奏以公督辦皖北平圩繳械事宜公稔知霍邱趙春魁六安文占魁三河尖潘塏父子轄圩地廣匿亡命殘害良善部分捕誅之於是潁霍六壽及河南光固諸屬賊圩負隅者皆望風乞命公指索其魁數十人寘諸法餘悉貸死旬日間撫定數百圩

繳械山積長淮底定公實終始其事時大軍圍金陵僞王陳得才糾悍寇三十萬眾自陝回竄圖救金陵狂奔入安徽境公逆擊於英山克其城賊來攻屢破之俄糾黨大至公誓死守圍七十餘日軍中資糧垂罄土人懷公德道山僻送米鐵絡繹至士氣益奮復大戰破之賊竄湖北陷羅田蘄水麻城公追擊於羅田解提督成大吉之圍不戰而復三縣賊復走安徽公閒道追襲斬馘數千解散倍捷時僧王諸軍大集公慮賊至六安地平衍難控制疾趨出其前十月蹙之霍山之長嶺菴徑險仄賊多墜崖死公遣劉維楨閒說賊將吳青汰范立川

倪濇淮各以眾降公督令倒戈攻賊陳得才飲藥自殺
餘眾分詣諸軍投誠公擇編營伍外遣散者二十餘萬
人初金陵既克朝廷以陳得才勢猖獗定皖楚豫三
省合剿議命曾公視師皖鄂之交至是公以三千人
扼之英霍每戰身先遂殄巨寇咸推公功居首僧王檄
詢軍狀公解得才屍軍前言賊懾王聲威藉蒞事不敢
邀賞王手書獎勞捷奏以獲賊酋功屬其部將總兵郭
寶昌而公僅還布政使銜其謙退善全如此是冬陝甘
總督楊勇懋公岳斌奏調公所部援甘次樊城軍士不
願遠征公攜歸原籍餉不給括私財散之引疾乞退

賞假兩月 朝旨敦迫五年別募安字營帥以入甘失
利於華亭大捷於平涼東道糧驛遂通九月入省署蘭
州道總城防軍需六年八月西甯河州回賊大舉犯省
城眾號三十萬公以所部千五百人守禦屢出奇兵破
之賊駭遁危城以全 命以按察使記名公分兵守阿
干鎮諸隘屏蔽省垣迭卻劇寇既總統諸軍籌運糧糈
招商榷稅錢粟皆自持理軍民感悅七年克狄道 賞
軍功隨帶三級八年二月署按察使十月卸任九年復
署蘭州道十年四月兼署按察使十二月授山西按察
使十一年十月蒞任以關內軍務未戢赴防河津十二

年五月入 覲還署布政使十三年四月回按察使任
光緒元年二月授陝西布政使兼理西征糧臺三年九
月 上以新疆軍務大順獎轉餉功 賞公頭品頂帶
烏魯木齊諸城復 命優敘四年乞休七月得 俞旨
初八日卒距其生嘉慶十五年正月二十三日年六十
九 命照軍營立功後病故例賜卹 贈內閣學士廕
一子入監讀書期滿以知縣用公貌清癯自童時畏寒
盛暑著棉終身不易然精神完強劇勞不倦性樸直不
喜隨世俗輒媚絕饋遺拒請託以是重爲人齒齟軍次
正陽關部卒見關堡張苗幟槍擊之有爲公裁抑之總

兵某以殺傷官兵誣訴僧王王飛章劾公 諭曾公察
覆誅趙春和或劾公擅殺三品武員曾公覆陳皆奉
旨昭雪將入甘湖北缺餉五十萬精臺靳不予至樊城
營勇索餉公誅倡首者自請嚴議總督以聞 恩免處
分光緒三年陝省旱災與山西埒公與巡撫譚公鍾麟
派員密勘荒政具舉故晉饑道殣秦地晏如而御史先
劾公陝紳復以厭聞災歉呈訴都察院及巡撫上陳
詔勿論於此見中立不倚之難而非公忠勛烏能獲
上若此哉子男三澤澐縣學生鹽運使銜江西補用道
澤澍舉人鹽運使銜道員用分省補用知府澤晟殤女

一殤孫男七德鈞三品頂帶四川龍安府知府德璜鹽
運使銜浙江補用道德蕃候選鹽大使德佐以劬學病
療聞公沒哀號三日死德宣翰林院待詔德鑫德孫
女四曾孫一隆昭三品廕生曾孫女五某年月日葬某
原德鈞泣以銘請銘曰

元公華裔國於期思降而爲庶支條葳蕤溫溫恭侯炎
靈以濟公暨果敏輝映曠世秉持正學匡飭頽風赤手
孤心障瀾使東出而謀軍不改素履其安如山其靜如
水神智內蓄驚伏虎夔義勇外發霆擊電飛江淮之間
盪決千里患不遺人功不私己孤軍度隴爰奠危疆於

晉於秦厥績孔彰青蠅羣飛日伺左側雖有積矢曷汗
我壁功豐於身報貽子孫樹碑刻券昭視無垠

誥授光祿大夫兵部左侍郎楊公神道碑

公諱頤字子異蓉浦其自號晚更號蔗農茂名楊氏系
出宋龍圖閣直學士文靖公時明正統間有諱蘭者官
廣東瓊州府教授遭亂流寓縣之白村遂爲其縣人曾
祖盛秀□□□□□事迹具府縣志傳祖敏修父儒望
俱縣學生三世以公貴 贈光祿大夫妣皆夫人公九
歲通五經十歲能屬文十六爲諸生學使李文清公棠
階才公之文以優行貢成均招致署中飲食教誨期勉
敦至咸豐壬子中式順天鄉試舉人同治乙丑成進士
改庶吉士散館授編修兩爲會試同考官一爲甘肅正

考官以纂修

穆宗實錄敘勞遷侍講轉侍讀充

日

講起居注官擢順天府丞調奉天府丞兼學政以大理
寺少卿督學江蘇遷左副都御史爲會試總裁官順天
鄉試副考官知會試貢舉晉兵部右侍郎轉左兩署工
部請假修墓光緒二十五年二月二十九日卒於家距
其生道光四年十月二十五日年七十有六某年月日
葬某鄉某原妻某氏妾某氏子彥深舉人某官彥澂彥
涵彥漪某某出女幾人適某某孫男幾人某某孫女幾
人曾孫幾人初公舉於京兆而歸值赭寇亂東南兩粵
無完土高州毗連梧鬱土寇葉牙其間乘隙竊發公與

郡人舉鄉團清內奸劇盜陳金缸爲粵西官軍所創竄
岑溪歲辛酉某月一日夜馳三百里陷信宜踞之圖犯
府城勢張甚民競逃徙城中羸卒百械餉不給官吏束
手公倡言曰城守須兵兵非難籌餉難無餉是無城也
盍速圖之毋以家委賊眾噉然曰諾括質庫得萬緡立
集團練數百募兵千繕庸浚隍籌禦完密信宜距郡八
十里賊聞備不敢犯人心大安輸貲十餘萬金益增營
扼隘賊間道襲城夜蟻附登礮斃數賊迺驚遁屢攻皆
卻之由是城守益固鄉民挈家來者數萬人迨官兵大
集陳金缸伏誅始末三年公日在行間治軍書籌饋運

值餉絀慮眾譁潰質家產三千金濟軍口絕不言事定
後郡中羣不逞以勒捐濫費控在事諸紳耆公置不與
辦久而公論始明方倉卒召集時公志保固鄉里而已
不暇計它利害及疑謗大興非公處事當持己廉幾不
免齟齬然後歎無權位而與公事者之難也同治間李
文清公入直樞密以正學倡導後進公受知最深恪守
師資尤嚴操履嫉貪墨高州屬化州稅廠蠹吏藉軍需
名誅索無厭公條列其弊請榜稅則曉眾 詔從之商
旅稱便光緒閒中外多故公屢陳事宜甲午日本之役
請懲失律以肅軍令雖未施行時論趨之然公性固和

易不立崖岸在都與齊甯孫文恪公毓汶吳縣洪侍郎
鈞太谷溫學士紹棠天門胡中丞聘之太和張布政端
卿及余爲文酒會酣嬉淋漓極一時友朋之樂不二十
年相繼以逝存者惟中丞及余而公督學江蘇與余先
後任知余將病免貽書勸沮彥深等請文其墓道之碑
追維疇昔許與氣誼泫然不敢辭乃爲銘曰

伯僑之裔厥惟楊侯失官徙蜀別派分流成都之雄鬱
爲漢豔中立耀宋實居南劍將樂有後釐宅於高積慶
於公英聲遠劭初舉孝廉不慕榮仕狂寇宵驚將踰我
里袒臂四呼眾懾且應不有其貲指揮立定蠹訖域伺

有。備。卒。完。我。尸。其。勞。貽。眾。以。安。翩。然。實。王。鳳。翔。文。苑。炳。
譽。詞。華。飭。躬。道。本。出。馳。輶。傳。豐。國。羽。儀。入。貳。卿。寮。補。
袞。有。思。邈。矣。倭。人。越。水。遼。海。孰。總。師。干。任。其。咎。悔。公。時。
抗。疏。王。誅。必。加。廟。謨。深。遠。時。議。驚。嗟。國。威。不。揚。再。
致。蹇。難。公。已。九。原。靈。其。憤。歎。武。略。定。亂。文。明。進。賢。有。攷。
公。迹。揭。此。高。阡。

署 欽差大臣辦理南洋通商事務兩江總督兼兩淮
鹽政江西巡撫兼提督銜李勤恪公神道碑

公諱興銳字勉林瀏陽李氏曾祖兆明 贈通奉大夫
祖宗任父錫祺皆榮祿大夫曾祖母劉 贈太夫人祖
母羅母周皆一品太夫人先世隱於農公昆弟四父歿
躬耕奉母晝秉鉏耒夜課弟讀雖處窮困不以自餒既
補諸生授徒邑里奉錢數千意豁如也咸豐壬子邑莠
民周國虞等倡亂號徵義堂勢張甚公集邑人舉團練
清內奸羣情大定江忠烈公忠源率師平瀏亂公有助
焉時粵寇陷江西撫州道萬載窺瀏公與守備周虎臣

越防虎劫賊不得逞邑教諭龍山李如崑夙奇公帥文
毅公遠燁邂逅公教諭所談竟夕歎曰如子肝膽可共
患難逾年文毅殉難東鄉公收其遺骸卒撫孤以成立
曾文正公國藩習聞文毅稱公賢又以教諭薦貽書相
招公謁文正於湖口軍中遂預謀議李公鴻章郭公嵩
燾李公元度交推重之奉檄總山內糧臺駐祁門皖南
郡縣迭陷祁門爲賊必爭地一夕數驚公擘畫周至饋
運疾給僞王古澧賢嘗以雪夜襲祁門公偵知預匿輜
重宅所賊至無所得江南難民萬餘仰食於臺先一日
結筏渡之咸得免有隊長劫民十金逃追獲立斬之故

流離之際城市案堵同治乙丑總鎮唐義訓等軍索饗
譁勢岌岌公單騎馳入營諭眾曰諸君數千里從軍爲
富貴計柰何自戕使賊知而躡吾後我無噍類矣饑缺
咎在臺約三日取給不足請殺我眾羅拜曰唯命公復
密訪首謀三人白文正戮之事遂定金陵旣克綜覈報
銷積存平餘銀四十萬兩或勸自私公曰爾謂是我當
得邪盜賊所爲吾不屑也悉以歸官至荷葉洲用精局
節嗇所入捐購義山聚暴骨二萬具瘞之文正移督直
隸奏公與偕使察災振畿南冒風雪入窮簷稽合所得
錢米數飯蔬甘藿巡厯殆徧揚舉仁清覈斥貪冒四月

而畢畿民感頌補大名府知府 特用道員以終養解
職文正再督兩江公總營務與彭剛直公王麟規畫長
江水師營制文正卒李公經義繼之值日本犯雞籠江
海戒嚴機要諮公而行公親歷江陰狼山吳淞崇明履
擇險隘倡設海防總上海機器局訪察西國新式增建
鐵船礮廠考工選材躬親十稔規模漸備遭母喪服未
闋 特召入都隨勘法越界務往來瘴區積患偏痺
命使日本至滬就醫藥餌不繼假滿開缺有資助者固
卻之曰貧吾素也老而病廢敢累人哉居數年愈署直
隸津海關道補天津道調山東東萊青道時威海衛沒

於日本屯兵待償公與定議丈地圈界使主客自爲守
閩閩以安蒞任八月額征有加贏餘四萬悉入之公擢
長蘆鹽運使權直隸按察使擢福建按察使再權布政
使旋實授入 觀調廣西光緒庚子 命巡撫江西拳
亂方棘 兩宮西狩江西頑民燬教堂數十積案二千
餘外人要挾艱於因應公奏劾疏防官十餘限三月讞
定償卹之費八十萬金不責之民間懼累良善也償款
定議分仞累百萬惟撙節營饗以彌其闕未嘗苛捐擾
下壬寅調廣東時奏辦隨糧捐按徵加三州縣丁米折
價不一胥吏上下其手民以重困公疏請但科正額不

及耗餘豁免諸瘠區及瓊州一府癸卯權閩浙總督廷
議亟新政營伍保甲更易規制次第設施而於裁併局
所經營商務尤勤勤注意甲辰颶災親省農田中寒病
甚乞假未幾奉調署兩江之 命公力疾赴任江督繁
劇爲行省冠百端待理不皇假息列邦迫索補償金價
公以中國財殫民困商諸疆吏請外部代奏力爭焦思
至竟夜不寐疾益篤以光緒三十年甲辰八月二十二
日卒於官距其生道光七年丁亥九月二十二日年七
十八妻氏蕭氏馬皆同邑氏姚籍桐城並 誥封夫人
先公卽世子熙元早卒蕭出孫鴻杲卒鴻幹出後公弟

子鴻·扶·曾·孫·謨·光·公·好·讀·書·然·不·以·學·自·名·性·澹·榮·利·
文·正·保·薦·輒·力·辭·同·事·多·躡·高·位·獨·公·晚·歲·以·特·眷·
授·節·鉞·於·權·要·一·無·援·繫·恃·忠·誠·結·主·知·每·言·官·彈·
事·下·公·察·治·人·莫·敢·以·私·干·惡·仕·路·奔·競·請·託·者·置·不·
省·振·拔·幽·滯·唯·恐·弗·及·所·至·積·習·一·變·愛·惜·物·力·被·服·
儒·素·僕·從·二·三·人·屬·僚·供·張·過·盛·輒·怒·卻·之·遇·事·矜·慎·
若·無·異·能·而·行·己·御·物·罔·不·矩·矱·先·民·務·揆·於·道·夕·就·
寢·默·誦·大·學·中·庸·一·過·數·十·年·如·一·日·其·勤·密·多·類·是·
在·金·陵·日·治·事·集·幕·僚·胥·吏·於·內·堂·自·當·戶·坐·議·定·立·
辦·人·莫·能·闕·訛·言·不·興·驚·相·告·語·以·爲·舛·見·不·知·公·行·

其素也。自粵寇之亂。湖湘才桀翊贊中興。由諸生起家。至大官者。唯公與彭剛直。劉忠誠。公坤一尤著。公廉正。如忠誠而不爲物累。峻厲如剛直而不務名高。可謂剛健篤實之君子已。病方亟。侍郎鐵良公奉命蒞江南。終朝三見。商略要政。鐵公初不識公。及卒。語及必歎惜。蓋至誠能動人云。遺疏聞。上軫悼。照總督例。賜卹。賞銀千兩。治喪。政蹟宣付史館立傳。賞鴻臚道員謨光及歲引見。尋賜祭葬。予謚勤恪。明年六月。葬縣東桐坑木魚山。首王趾丙公弟皆早世。撫教諸姪。不異所生。宦橐薄餘遺。令均析在。它人爲難能於公特。

其末節姪昌洵從余學述公軼事特詳泣以銘請銘曰
維古英儒以學理性其用貞亨其體淡定公耕且讀身
瘠道腴逃名名歸終騁皇衢出參軍事惟謀克勇輦
金如山義不爲動辭榮居晦辭助居窮晚躋達僚靡土
不頌開府粵閩咸有嘉績大江左右亦流其澤世柔如
韋我直如弦獨秉忠信以涉大川羣公羣士僉謀變夏
家有千金走求諸野公不違時猶存古風體天覆物以
仁達忠是謂法臣是謂正學遺此一老鎮浮激濁俯歎
世局仰唏哲人聲之銘詩詔示無垠